

Camara di seguridad a graba persona cu lo a drenta cas pa horta



Ya algun biaha, ciudadanonan ta confronta e situacion dificil unda nan ta bira victima di hortamento. Mayoria di caminda tin camara pa asina por tin un miho control y mayor seguridad, manera den sector turistico; sinembargo tin barionan cu cas cu ya

caba ta dispone di un circuito di camara pa evita bira victima di ladron.

Esaki ta e caso di un pagina riba Facebook yama "Aruba contra Ladron" riba cual e administrado a dicidi di publica video di esnan cu nan ta considera "ladron" debi na e



actitud cu nan por a muestra riba video.

Recientemente, a publica potret di un homber bisti cu T-shirt preto y pechi, canando pia abao cu tas kibra unda por mira cu e ta cana den bario y ta busca "algo pa

haci."

Den e comentarionan a pone diferente video di e persona aki cu ta parece a drenta un cas cu pool, ta cana y wak rond di e cas unda tambe por mira cu e ta purba di habri un porta.

Ta parece straño pero no ta un

bes so el a yega di drenta den e mesun cas unda tambe por mira den otro potretnan, e mesun persona pero cu otro paña y cu keds bisti, purbando di habri e porta di e cas.

Mesora usuaronan di rednan social a cuminsa bati alarma y tag Cuerpo di Polis, minister di Husticia Rocco Tjon y hasta parlamentarionan debi na e preocupacion cu esaki ta causa pa habitantenan di e bario aki.

Algun di e comentario di usuaronan a sigura cu ta trata di un "choller" cu algun usuario a yega di wak'e na Playa of na Paradera segun a sigura.

Cierto ta cu camaranan di seguridad ta yuda hopi den casonan aki, vooral den bisindarionan mas luhoso unda algun casnan no tin cura y hendenan por drenta, aunke tin camaranan cu ta graba tur cos.

E video aki a ser graba den bario di San Migel y Koyari segun e publicacion mes ta señala.

Gerlien Croes ta lansa oficialmente su partido Futuro



Ayera nochi, riba Dia Internacional di Democracia, parlamentario independiente Gerlien Croes a anuncia su partido nobo, Futuro, na caminda pa eleccion dia 6 di december binidero.

Croes, ken a cuminsa su carera politico riba lista di

partido AVP y eventualmente a bandona e partido, a anuncia su partido politico nobo, Futuro, durante un evento na Casibari Rock Formation ariba Dia Internacional di Democracia.

El a remarca cu el a scoge e Dia Internacional di Democracia especificamente pa lansa

su partido pa duna inicio na biba democracia na Aruba y duna espacio y oportunidad pa cambio di pensamiento politico na Aruba, cu idealnan grandi y anhelo pa cambian grandi por tuma luga.

Durante su discurso, Croes a enfatisa e necesidad pa transparencia, union, representa-

cion y respet pa e pueblo di Aruba.

Despues di su discurso, Bon Dia Aruba a puntra Croes tocante e lista di personanan cu lo forma parti di su partido pa e eleccion binidero. E parlamentario independiente no a duna detaye pero a indica si cu no tin un limitacion di cantidad di persona cu lo por subi lista di partido Futuro y cu e anoncionan lo cuminsa tuma luga durante e simannan binidero.

A puntra e lider di e partido nobo si Futuro haya e oportunidad pa sinta den un gobierno di colacion, si tin algun

partido cu nan lo descarta pa forma coalicion cune, Croes a remarca cu lo mester warda pa wak kico e resultado di eleccion lo duna.

El a agrega cu si ta papia di futuro y cu durante su discurso el a menciona division y desunion den e comunidad, locual cu nan kier ta lo contrario y el a subraya cu e ta abierto pa combersa na bienestar di pais Aruba.

Por ultimo, pa loke ta trata ideologia di su partido, Croes a indica cu esaki ta un movimiento progresivo, pero a base di e norma y balornan di pais Aruba.

